

МОНГОЛ УЛСЫН ЕРӨНХИЙЛӨГЧИЙН АНХАН ШАТНЫ СОНГУУЛИЙН НЭГДСЭН ДҮНГИЙН ТУХАЙ

*Илтгэгч нь: С.ЛХАГВАСҮРЭН –
Улсын Их Хурлын
дэргэдэх Сонгуулийн
ерөнхий хорооны дарга*

Монгол Улсын Их Хурлын хүндэт дарга, эрхэм гишүүд ээ!

1997 оны 5 дугаар сарын 18-ны өдөр Монгол Улсын Ерөнхийлөгчийг сонгох анхан шатны сонгууль амжилттай явагдлаа.

Улсын Их Хурлын дэргэдэх Сонгуулийн ерөнхий хороо Монгол Улсын Ерөнхийлөгчийн анхан шатны сонгуулийн нэгдсэн дүнг Улсын Их Хурлын чуулганы хуралдаанд илтгэж байна.

Энэ сонгуульд хуульд заасны дагуу Улсын Их Хуралд суудал бүхий МҮАН, МСДН хамтран Пунсалмаагийн Очирбатыг, МУНН Жамбын Гомбожавыг, МАХН Нацагийн Багабандийг тус тус Ерөнхийлөгчид нэр дэвшүүлж, нэр дэвшигчид өөрсдийн мөрийн хөтөлбөр, үзэл бодлоо тайлбарлан таниулж, нам болон сонгуульд хамтарсан намууд нэр дэвшигчээ чөлөөтэй сурталчиллаа.

Сонгуулийн ерөнхий хороо сонгуулийн хууль тогтоомжийг нэгдсэн ойлголттой хэрэглэх, сонгуулийг бүхэлд нь хуулийн дагуу явуулах зорилгоор нутаг дэвсгэрийн болон салбар, хэсгийн хороодын дарга, гишүүдийн нэгдсэн семинар хийж, Ерөнхийлөгчийн сонгуулийн хуулийг хэрэгжүүлэх ажлын төлөвлөгөө, хуваарь баталснаар анхан шатны сонгууль бэлтгэн явуулах зохион байгуулалтын ажилдаа орсон юм.

Улсын хэмжээнд Ерөнхийлөгчийн анхан шатны сонгуулийн бэлтгэл ажлыг зохион байгуулах үүрэг бүхий сонгуулийн нутаг дэвсгэрийн хороо 30, салбар хороо 333, хэсгийн хороо 1552 байгуулагдан, эдгээрт төрийн байгууллагын ажилтан, намуудын төлөөлөгчдөөс гадна нам бусчууд, ахмадууд, залуучууд зэрэг нийгмийн бүхий л давхаргыг төлөөлсөн 15075 хүн ажиллалаа.

Сонгуулийн хороод Ерөнхийлөгчийн анхан шатны сонгуулийн санал хураалтын бэлтгэлийг бүрэн хангах, сонгогчдод хууль сурталчлахад үйл ажиллагаагаа чиглүүлж, энэ ажилд төрийн захиргааны холбогдох байгууллага, албан тушаалтны дэмжлэг, туслалцааг авч, төрийн харъяалал бүхий хэвлэл, мэдээллийн хэрэгслийг өргөн ашиглалаа.

Монгол Улсын Ерөнхийлөгчийн анхан шатны сонгуульд нэрийн жагсаалтад бичигдсэн 1 155 228 сонгогчийн 85,06 хувь буюу 982 640 нь санал хураалтад

оролцож, үүнээс 955 670 буюу 97,3 хувь нь нэр дэвшигчдийн төлөө саналаа өгсөн байна. 26 970 саналын хуудас хүчингүй болсон нь нийт саналын хуудасны 2,7 хувь болж байна.

Сонгуулийн зарим хэсгийн хороонд сонгогч саналаа өгөхөөр ирэхдээ иргэний паспортгүй болон шилжүүлэг хийлгээгүй ирэх, саналын хуудас илүү авч, өөр хүн төлөөлж санал өгөхийг оролдсон зэрэг зөрчил гарч байсныг тухай бүрт нь хуульд нийцүүлэн шийдвэрлэсэн болно.

Архангай аймгийн Хайрхан сумын Жарантай багийн 56 дугаар хэсэгт саналын хайрцгийг хуульд заасан цагаас өмнө нээсэн учир нутаг дэвсгэрийн хороо Ерөнхийлөгчийн сонгуулийн хуулийн 38 дугаар зүйлийн нэг дэх хэсгийн хоёрт заасныг үндэслэн уг хэсгийн санал хураалтыг хүчингүй болсонд тооцож дахин санал хураалт явуулсан. Баянхонгор аймгийн цэргийн хэлтэс цэргийн албанд шинээр татагдсан 16 цэргийн паспортыг эздэд нь хүргэж өгөөгүйгээс санал хураалтад оролцож чадаагүй зэрэг зөрчил тухайн хэсгүүдэд гарсан байна.

Монгол Улсын Ерөнхийлөгчийн анхан шатны сонгуулийн бэлтгэл ажлыг бүхэлд нь авч үзвэл Сонгуулийн нутаг дэвсгэрийн болон салбар, хэсгийн хороод эрх, үүргийнхээ дагуу ажлаа хуулийн хүрээнд сайн зохион байгуулсан нь улсын дүнд нөлөөлөхүйц ноцтой зөрчил гарахгүй байх нөхцлийг бүрдүүллээ гэж Сонгуулийн ерөнхий хороо үзэж байна.

Ерөнхийлөгчийн анхан шатны сонгуулийн бэлтгэлийг хангахад Монгол Улсын Гадаад харилцааны яам, Цагдаагийн ерөнхий газар, бүх шатны Засаг дарга нар, тэдгээрийн Тамгын газрын ажилтнууд болон Цахилгаан холбоо, “НИК”, “МИАТ”, хэвлэлийн “Хатан-Эрдэнэ” компани, авто тээврийн байгууллагууд идэвхтэй оролцсоныг зориуд сайшаан тэмдэглэж байна.

Монгол Улсын Ерөнхийлөгчийн сонгуулийн үйл явцыг дэлхийн улс орнууд анхааралтай ажиглан харж байлаа. Санал хураалтын ажиллагаанд АНУ, ОХУ, Япон, ХБНГУ, Турк, Индонез, Малайз улсын 23 ажиглагч, түүнчлэн гадаад орнуудын хэвлэл мэдээллийн байгууллагын 21 сурвалжлагч хүрэлцэн ирж ажиллав.

Улсын их Хурлын эрхэм гишүүд ээ!

Ерөнхийлөгчийн анхан шатны сонгуулийн нэгдсэн дүнгээс үзэхэд МАХН-аас нэр дэвшсэн Нацагийн Багабанди нийт сонгогчдын 60,81 хувийн, МҮАН, МСДН хамтарч нэр дэвшүүлсэн Пунсалмаагийн Очирбат 29,81 хувийн, МУНН-аас нэр дэвшсэн Жамбын Гомбожав 6,64 хувийн саналыг тус тус авсан байна.

Монгол Улсын Ерөнхийлөгчийн анхан шатны сонгууль Үндсэн хууль, Ерөнхийлөгчийн сонгуулийн хуулийн дагуу явагдсан гэж Сонгуулийн ерөнхий хороо үзэж байна.

Энэ дүгнэлтээ үндэслэн Монгол Улсын Үндсэн хуулийн гучин нэгдүгээр зүйлийн 4, Ерөнхийлөгчийн сонгуулийн хуулийн дөчин нэгдүгээр зүйлийн 1 дэх хэсэгт заасны дагуу Монгол Улсын Ерөнхийлөгчийн анхан шатны сонгуульд нийт сонгогчийн олонхийн санал авсан Нацагийн Багабандийг Монгол Улсын Ерөнхийлөгчөөр сонгогдсон гэж үзэж бүрэн эрхийг нь хүлээн зөвшөөрүүлэх тухай Улсын Их Хурлын даргад өргөн мэдүүлснээ Монгол Улсын Их Хурлын чуулганы хуралдаанд илтгэж байна.

Анхаарал тавьсанд баярлалаа.